

امانيفستو

ديوانه بالعامية المصرية



مصطفى إبراهيم



امانيفستو

ريوانه بالعامية، طهرية

مصطفى إبراهيم



دار بلومزبري - مؤسسة قطر للنشر
BLOOMSBURY
QATAR FOUNDATION
PUBLISHING



الطبعة الأولى ٢٠١٣
دار بلومزبري - مؤسسة قطر للنشر
مؤسسة قطر، فيلا رقم ٣، المدينة التعليمية
صندوق بريد ٥٨٢٥
الدوحة، دولة قطر
www.bqfp.com.qa

حقوق النشر © مصطفى إبراهيم ٢٠١٣
الحقوق الفكرية للمؤلف محفوظة

جميع الحقوق محفوظة

لا يجوز استخدام أو إعادة طباعة أي جزء من هذا الكتاب بأي طريقة بدون الحصول على الموافقة الخطية من الناشر باستثناء في حالة الاقتباسات المختصرة بالدراسات النقدية أو المراجعات.

الترقيم الدولي: 9789992195840

طبع في مصر بشركة صحارا للطباعة

المحتويات

٩ I
١١	من قواعد الدائرة السبعة: قاعدة ١
١٣	تفرانيل ٥٠
١٨	فلان الفلاني
٢٢	سفينة نوح
٢٧ II
٢٩	من قواعد الدائرة السبعة: قاعدة ٢
٣١	تفرانيل ٧٥
٣٦	مع الثورة ذلك أفضل جدًّا
٤٠	دين الجدعنة
٤٣ III
٤٥	من قواعد الدائرة السبعة: قاعدة ٣

١١٣ VII
١١٥ من قواعد الدائرة السبعة: قاعدة ٧
١١٧ ديالوج
١٢١ إني رأيتُ اليوم
١٣٩ مانيفستو

٤٧ ١٠٠ تفرانيل
٥٥ الأنبياء كثيرة
٥٨ بني هذا الوطن
٦١ IV
٦٣ من قواعد الدائرة السبعة: قاعدة ٤
٦٥ المولوية
٧١ ثم دارت اللمونة
٧٥ دولة الثوار
٧٩ V
٨١ من قواعد الدائرة السبعة: قاعدة ٥
٨٣ خمس خمسات
٩٠ دعاء الدبابة
٩٣ بندعيلكو
٩٧ VI
٩٩ من قواعد الدائرة السبعة: قاعدة ٦
١٠١ سيب
١٠٤ ورق النتيجة
١٠٧ من هوامش السيرة غير الذاتية لمحمد محمود
١١٠ كعشق الكراسي لواحد ما جاش

I

يروى الفترة من أول الموضوع.. وحتى التحام
الفرد بالمجموع

من قواعد الدائرة السبعة

قاعدة ١

أبعد نُقطة بِالنِّسْبِالك
جُؤا الدائرة... هِيَّ مكانك
ولأنَّ أساسًا ف الدائرة
هنا هوَّ هناك
ف طبيعي تحس انك عايش
باتنين جُؤاك

تفرانيل ٥٠ (١)

أنا بفضل دايمًا للآخر
ف جيمات الكونكان والشايب
وف كشف الحاضر والغايب
وف حجز شُقق مَصيف بلطيم
أنا آخر تايب ف صحابي
وآخرهم ف الصلاة ف التسليم
وف دور المدرسة في التطعيم
وف وقت السين
أنا آخر جيم
أنا جرح قديم.. كان متغطي

(١) تفرانيل: عقار مضاد للاكتئاب.

إكمني مَشْتِي ولا بس كُم
سَبَّني الدنيا بستين أم
وسَبَّتلها ميت ملة ودين
ولحد ما تَمَّيت ست سنين
أنا كنت بحب البني آدمين
وكرهت الناس من بعديها
علشان نَسُوني أنا أصلاً مين
مش فاكر إمتي حقيقي بدأت
إنما فيه فترة فاكرها طشاش
كان فنجان قهوتي ما بيفضاش
وبكلم ربنا طول الوقت
عُمري ما صدقت
بنات غير ريم
ويمكن دلوقتي ما اصدقهاش
آخر مرّة
شُفتها فيها
كانت تقريباً بتعزل

وكان فيه سواق تاكسي منزل
ف شنط ناس هتحل مكانها
ووشوش بني آدمين ما اعرفهاش
أنا ريم يمكن كانت قدي
أيامها.. لكن دلوقتي أصغر
عارفة إن أنا يومياً بكبر..
وبعجز إكمني ما بنساش؟
أنا فاكر أيام بالمللي
أنا فاكر أيام بالتفصيل
أنا فاكر يوم دفنة أختي
هتصدقني؟ أكثر ما فاكرها
وساعات بنسى ف ليلة كبيرها
أنا فاكر شقة قصر النيل
ومش فاكر حد من السُكان
من صُغري وعُمري ما بنسى مكان
أنا أصلاً فاكر بيت شادي
مع إني ما زرتوش غير مرّة

بأمانة فيه برواز برّه
كان جَوَّاه صورته ف إعدادي
كان لِسَّه ساعتها طألعله شنب
وانا حاسس إني طلعللي أتب
مِنْ تُقْل الشَّيْلة وم التفكير
معلش أنا آسف برُغي كِتير
وبسِنِّ ف وقتك وف وقتي
أنا حاسس بدماعي بتتقل
أنا نفسي أناام
أنا عاوز أروِّح دلوقتي
مُتَشكر جدًّا ع الجلسة
- هنكمل إمتي علاج طيِّب؟
لازم هنشوف بعض قُرَيْب
أنا ماشي
سلام

بعد اللي كُله الناس شافوه
إزاي ما زالوا بيَعرفوا.. فرق لقطات الإعادة
من حالات الديچافو^(١)؟

(١) الديچافو: كلمة فرنسية بمعنى «شاهد من قبل» تستخدم للإشارة إلى ظاهرة شعور الفرد بأنه رأى ما يحدث في الحاضر كله من قبل بجميع تفاصيله.

ساعة لَمَّا قُلْنَا زهقنا وهنمشي
فُلان اللي ما رضيش ياخذ مِنِّي أُجْرَة
ساعة لَمَّا قلت إني رايح مُظاهرة
فُلان اللي قاللي هيتنحى بكرة
وهنفرح ونرقص وراح تبقى سهرة
فُلان اللي بالفيسبا طالع وداخل
يجيب اللي يتصاب من الضرب جُورًا
فُلان اللي ف الضرب عند المداخل
يرجّع صحابه.. ويستنى هُورًا
فُلان اللي كان بيناولني القزايز
ويقفلها بعد اما أعبيها جاز
فُلان اللي يشرب ويسألني عايز؟
فُلان اللي كان وشه مليون قزاز
فُلان اللي ورَّع عليك بطانية
ويسأل «فيه جنبك مكان ع الرصيف؟»
فُلان اللي نازل عشان القضية
فُلان اللي نازل عشان الرغيف

فلان الفلاني

فُلان الفُلاني اللي كان يومها جنبي
ساعة لما بدأوا في ضرب الرصاص
فُلان الفُلاني اللي ما اعرفش اسمه
ف دايمًا بقول يا ابن عمي وخلص
فُلان اللي سابلي بقية ساندويتشه
ليلة لَمَّا شافني بغني وجعان
فُلان اللي مش فاكرة غير شكل وشه
فُلان اللي عدَّاكي جُورًا الميدان
فُلان اللي فتنسني بالإبتسامة
فُلان اللي قال هو فعلاً هيمشي؟
فُلان اللي قاللي طريق السلامة

فُلان اللي ما طلّعش جُؤًا البرامج
وكان بس صوته في قلب الهتاف
فُلان اللي رَوَّح أَكَل واستحمى
فُلان اللي ضايح في وسط الآلاف
فُلان اللي غرَّقلي خَل الكوفية
وشالني ساعة لما جت طَلقة فيّا
فُلان اللي مات يومها تلزمله دِيّة
من ابن الفُلاني اللي كَل لحمه حاف

الخائفون من الفراق.. والخائفات
والعارفون أن اللقا بيدوم ساعات
كُلُّ في فلكٍ يسبحون.. ويذبحون
عُمر الحاجات الجاية على حِس اللي فات

المعركة قُدَّام
الثورة مفهَاش رُتب
غير رُتبة العسكري
ولا حد غير العَلم
راح ينضربُله تمام
وآدي سفينة نوح
جُؤا الميدان طافية
بتلم فيها يا مصر
من كل زوج آلافات
يتلم فيها النوح
ع الضحك والأفية
يتلم فيها الصبر
على رنة الهتافات
نتحامى وقت الهوا
م الموج ف بعضينا
و الشق.. نلضم سوا
ونسده بإيدينا

سفينة نوح

الليل كما الغربال
أما النهار ييلم
والعبرة باللي ابتدى
قبل العدد ما يتم
يا عبادة وسط الهرج
يا قلة جايبة الفرج
الثورة ركعة قضا
مفهاش إمام بيثم
يا معشر الثوار
الكل فيكوا إمام
يا جنرالات إنزلوا

ومهما الطوفان يعلى

نطلع ونعلى معاه

سيبوا الطريق لله

العبرة بالمينا

يا شعب ما استناش

خذ حقه بدرأه

يا وطن ما يساعناش

واحنا اللي بنساعه

الدم لون واحد

مفهومش عبيد ولا سيد

وان بعنوا دم شهيد... بكرة... هتباعوا

أنا أحسن واحد يقدر يقنعك تحكي.. وما بيحكيش

أنا أحسن واحد يقدر يقنعك تبكي.. وما بيبيكيش

أنا أحسن واحد يقنعك تفرح

وأحسن واحد يقنعك تجرح

أنا أحسن واحد ميت

يقدر يقنعك...

تعيش

II

آخر ما قال ع الموت.. والدَّم ف شفايفه:

خَايفُهُ.. ومش خَايفُهُ

يا ريتكو سامعين هتافكو كيف ما انا سامعُه

يا ريتكو شايفين يا رفاقة كيف منا شايفه

من قواعد الدائرة السبعة

قاعدة ٢

كُلُّ أَمَّا تَحْسُ إِنَّ الصُّورَةَ
مَا بَقَّاش فِيهَا مَرَاكِبَ سَايِرَةَ
اِفْتَكِرَ إِنَّهَا أَصْلًا كُورَةَ
وَفِي مَسْقَطِ رَأْسِي تَبَانِ دَايِرَةَ
فَ عِشَانِ كِدَهُ لَمَّا بَتَّقِفَلَّ
وَتَسْدُفِ وَشَكِّ مَلْيُونِ بَابِ
مِنْ غَيْرِ أَسْبَابِ
مَا تَقُولُشِ الْحِظِّ إِدَانِي قَفَاهِ
وَإِنَّهُ طَلَعُ فَالْصَوِّ وَالْأَمُونِيَا
الْحِظُّ يَا عَمَّ إِدَّاكَ وَشُهُ
مِ النَّاحِيَةِ التَّانِيَةِ مِنَ الدُّنْيَا

تفرانيل ٧٥

أنا فاضل لِسَّه معايا
كام «أول مرة» ف جيبي؟
كام عود كبريت ف العلبه
ما رضيش يولع ع الفاضي؟
كام عود ملهوش ولا سابقه
ف الحرق إلا المرّادي؟
أول مرّة أدخل سيما
مع بنت.. كانت ف إعدادي
كان كده للموضوع قيمة
وبعديها خلاص.. بقى عادي
أنا آسف جدًا جدًا

على أول مرّة اتحرقتُ
ع الفاضي ومش وياكي
وأبوسك أول بوسة
تتباس أصلاً ف حياتي
وأتأسف بَعْدِكَ تاني
على أول مرّة مَعَاكِي
وأتأسف تاني وتالت
على كل كلام اتقال
وأحرق ف حاجات اتقال
كانت لازم تتشال
لبتوع الدور الجاي
والجاي أبقى من الفايث
وميت بيسلم حَي
والميت وإن كان تافه
ف يفضل ملهوش زِي
ف انا ها أفضل فاكر مي
وأول إيد بنت أمسكها

وأول شو كولاتة هدية
وأول توصيل للبيت
ولحد ما فجأة لقيت
مش باقي معايا ف جيبي
غير كام «أول» يتعاش
لا اعرف إن كنت هاشيلهم
ولا هابيعهم ببلاش
مُشكر جداً جداً
على وقتك تاني يا دكتور
- العفو يا سيدي.. اتفضل
واديتني رُوشتي تاني
مشطوب منها أربع تسطر
- مش حاسس إنك أحسن...
- من آخر مرّة تجيلي؟
مش حاسس أصلاً حاجة
وعلى إيدك يعني أديلي
ساعتين عمّال أتكلم

ومش فآكر نص كلامنا
- السبت الجاي معادنا ؟
- لأ دننا الحد.. نسيت
- خُذ بالك بقى من نفسك
- وفيه دوا هنكره تاني
أنا أصلاً هأبقى كويس
ومفيش حاجة مضايقاني
وأخذت الباب ف إيديا
وما صدقت إني مشيت
...

كان فاضل لِسَّه سيجارة
ف العلبة لقيتها معايا
بس استخسرت أشربها
قبل أمَّا أوصل للبيت

لملم خسايك بعد ما تخسر
من بنت فعلاً مش قصدها تأذيك
وإنوي اللي بعديها... تاخذ زمن أقصر
من إنه يعمل ذكرى بعدها تبكيك

دمك يسقي الارض.. وانا دمّي للحكام
يظهر وراهم نور.. فيبصوا فوق ع الضوء
يملا السما ملاكين.. ويقربوا منهم
وف أول الرحلة.. الطالعة بيهم فوق
بدأوا كلام.. قام دار.. هذا الحوار.. بينهم

...

قال الشهيد للشهيد ف السما الأولى
الطلقة مش طايشة.. والدولة مسؤولة
قال الشهيد للشهيد ف السما الثانية
الأرض طبّت جنبي مقتولة
قال الشهيد للشهيد ف السما الثالثة
الحظ جابنا.. واحنا مش فلتة
قال الشهيد للشهيد ف السما الرابعة
الدم هيروح فين؟.. الدائرة مقفولة
قال الشهيد للشهيد ف السما الخامسة
الأرض دي.. متبوعة مش تابعة
لو كان دعاكوا نزول وانا لسه وسطيكو

مع الثورة ذلك أفضل جدًا

قابل شهيد الثورة ف الآخرة.. شهيد الحرب
قاله يا بختك يا أخي.. عارف بتضرب مين
أنا مت ما اعرفشي.. كان جاي مينين الضرب
كل اللي كانوا هناك... شبيهي ومصريين
أنا وانتا متنا صحيح.. علشان بلدنا تعيش
وانا وانتا متنا صحيح.. شجعان.. وينقاتل
أنا جيت هنا علشان.. إيدي ما طاوعتنيش... أقتل
وانتا عشان.. أبطأ من القاتل
إننا الجميع خلفك.. من ناس ومن سلطة
وانا الجميع خلفي.. من جيش ومن شرطة
إننا شهيد رسمي.. وانا لسه فيا كلام

يبقى ف غيابي تنزلوا ادعى
قال الشهيد للشهيد ف السما السادسة
مين كان من الأنبيا مش قلة مُندسة؟
وحكى الشهيد للشهيد م السما السابعة
عن ثورة تانية هتيجي .. أقوى م الأولى

ورا كل كلمة سببتها وطلعتُ
فيه كلمتين ما رضوش
ورا كل دمعة سببتها ونزلتُ
فيه دمعتين ما رضوش
ورا كل كاس أحزان
فضّيته بالنسيان
فيه ألف كاس ملىان
بيزيدوا ما بيفضوش

دين الجدعنة

أدين ب دين الجدعنة وب دين رفاق الدرب
وب قولة إحنا .. مش أنا .. ف المعمة والضرب
وب دين ما كنت مصدقه .. ف المعركة الأولى
وب دين جثث ف المشرحة .. أساميتها مجهولة
وأدين من ساب .. على الأسفلت .. إخوانه مقتولة
واقولهُ التوبة مقبولة .. إلا ف وقت الحرب

نُشِبِه لذرّات الهوا .. وقت الجليد والبرد
بِتَكْتَفٍ وَبِتَقَرَّبِ أوي من بعض
وَتَرَجَع تاني تَتَفَرَّقِ
مع أول دفا تَشْمُهُ
كِرِهنا الشمس بِسببكو
يا شَعْب البرد بيلُمُهُ

من قواعد الدائرة السبعة

قاعدة ٣

فَرَقَ السُّرْعَاتِ جُؤًا الدَّائِرَةَ
بَيْنَكَ وَمَا بَيْنَ كُلِّ الْمَاشِيِينَ
هُوَ الَّذِي هِيَ قَدْرٌ يَضْمَنُكَ
إِنْ أَنْتَا تَقَابِلُ نَاسًا تَانِيِينَ

تفرانيل ١٠٠

أنا شعري غامق
بس قلبي مطلق أبيض من زمان
جائز عشان
الناس ساعات بتلاقي ناس
تعرف تشوفها بجِد
وانا قلبي لِسَّهْ عُمره ما اتكشف على حَد
بقابل قَدَّ ما بقابل
وأفارق قَدَّ ما بفارق
وما اتعلمش
بَلْخُبط في الأسامي عشان
بَخَاف أنسى

بَلْخَبَطُ فِي الْحَيَاةِ عِلْشَانَ
بَخَافَ لَا مَا أَعِيشُ
بِقَالِي كَثِيرَ مَا بَتَكَلَّمْتُ
بَخَافَ يَبْقَى الْكَلَامُ مِتْعَادَ
مَا كَمَلْتُشْ فِ أَيِّ رَحِيلِ
مَا كَمَلْتُشْ فِ أَيِّ قُعَادِ
وَبِدِّي لِلْحَيَاةِ بِالْكَادِ
مَا يَكْفِيهَا ..

وَيَكْفِينِي
شُرُورَ الْبَهْدَلَةِ فِيهَا
مَلِيشْ فِ الْبِنْتِ طَلْبَاتِ غَيْرِ
تَنْسِينِي اللَّيِّ قَبْلِيهَا
وَبَدْخُلْ فِ الْحَاجَاتِ تَخَاطِيفِ
وَعَيْنِي عِ اللَّيِّ بَعْدِيهَا
رَقِصْتِ كَثِيرَ عَالِي السَّلْمِ
بَخَافَ أَطْلَعِ
وَأَخَافُ مِ الْأَرْضِ

- أَكِيدُ الْخَوْفَ مِشِ الْفِكْرَةَ
وَحَتَّى يَا سِتِّي يَعْنِي بِفَرْضِ
أَكِيدُ الْخَوْفَ مَا هُوَ أَشْ عَيْبِ
طَبِيعِي النَّاسِ تَخَافُ مِ الْغَيْبِ
وَمِ الْمَقْدُورِ
بِرَغْمِ كَدِهِ

بِحِبِّ الضَّلْمَةِ أَكْثَرَ مَا .. بِحِبِّ النُّورِ
سَاعَاتِ بَتَمْنَى شِقَّةَ فِ بَرَجِ شَايْفَةِ النَّيْلِ
وَأَوْقَاتِ إِنِّي أَعِيشُ مَسْتُورِ
وَبَزْهَدْ... كُلِّ مَا فِ الرَّحْلَةِ مِنْ زُخْرُفِ
وَمَا أَزْهَدْهَاشِ
مَا دَامَ فِيهَا رَمَقٌ يَتْعَاشِ
أَكِيدُ فِ الرَّحْلَةِ يَوْمَ مِتْحَاشِ
وَمِسْتَنِي أَعْدِي عَلَيْهِ
- وَتَعْرِفُ عَنْهُ أَصْلًا إِيهِ؟
مَفِيشْ غَيْرِ إِنَّهُ لِسَّهْ مَا جَاشِ
بِنَامِ؟

طبعًا.. كثير جدًا

وبالأيام

وطول الوقت بحلم إن أنا بجري

وبشبع م الحاجات بدري

ورغم ده لسه ما شبعتش

من الجري ومن الأحلام

بخاف م الموت

عشان خايف ساعتها أكون

عبيط.. كل اللي سبته.. كلام

بشوف أفلام

عن الدنيا

وعن حكايات

لناس عاشت حاجات تانية

وعن حكايات لناس ما عاشوش

وبتأثر

وبتحسر

على كل اللي كان ممكن

أكونه

بس ما بقيت هوش

ما سبتش شيء ما جرّبتوش

ولا جرّبه وما سبتوش

بحب العود

واحب الناي

وأموت وأعرف حقيقي إزاي

حاجات من دي

ساعات بتدب فيها الروح

من اللمس ومن الأنفاس

فتبقى حية أكثر.. م البشر والناس

مفيش إحساس

لحسن الحظ ولسوءه

ما بيعديش

مفيش ولا طعم حاجة من اللي بتدوقه

مسيره يعيش

بحلوه ومُرّه كله بيتسخط لمفيش

يا سبحان اللي بيعدو ناع الحاجة
فَنَسَاها

وييخفف كاسات الناس
بِمِيَّهٍ بَدَالِ مَا يَمْلَاهَا
عشان طَعْمِ اللي فيها يروح
عشان طَعْمِ اللي فيها يخفّ
يقولوا مجازًا المجروح
إذا خدع الوجود .. بيخفّ
تلف عليه سواقي الكون
تَدَوَّبَ اللي فات
في الجاي
ف سبحانه أما قال
منها جعلنا
«كُلَّ شَيْءٍ حَيٍّ»
زمان فيه حد علّمنا
في درس الدين
دُعَاءِ يَقُولُ

يا خالق كل شيء ناقص .. كِمَالَتِهِ مَعَاكَ
يا شايِل م الحاجات حته .. بِنْتِرَجَّاكَ
بحق المشهد الكامل
واسمك اللي أنا عرفته
تسيب اللي يكفينا
وتكفينا بما سبته
ما تحوجناش
لجاي ما جاش
وترضينا بما جبته
وندعي وراه بصوت عالي
يرج الفصل رج خفيف
وأكمل دعوتي في سري
«وترحم قلبي في شيبته»
كما تدعو الفروع الأصل
دعوتها
ف كل خريف

الأنبياء كثيرة

يا مصر لِسَّه الأنبياء كثيرة
جيل ابن نفسه في زمن عيرة
ريحة هُدومهم خَل وخميرة
ويكتبوا السيرة.. وملهمش ف الإملا
يا مصر لِسَّه الأنبياء بالكُوم
ختم النبوة بغُرز.. وبشاش.. وميكروكروم
طلَّ الشهيد م السما لصحابه آخر اليوم
خلَّى الجميع يبكي
وخلَّى الهتاف يعلى
السيرة سيرة عيال.. واقفة ف أول صف
يقولوا دَم بدم

أرجوك يا زمان
خبِّي المقدور
الضلمة براح أكثر م النور
سبيني أتخيل.. إن أنا بختار
قبل أمّا أعرف.. إن أنا مجبور

ويردوا كَفَّ بِكف
أم البطل تبعته
يرجع شهيد.. يتزف
بالبدلة متقطعة
وبدم ع الدبلة

أنا فعلاً إيه.. غير حنة طين؟
تنشف م الشمس ف ساعة الصبح
وتبوش بالليل.. م الأدرينالين^(١)

(١) الأدرينالين: هرمون يفرزه الجسم عند الشعور بالخوف.

عشان تاخدوه
بني هذا الوطن.. وبنوه

بني هذا الوطن

بني هذا الوطن وبنوه
ما عاد متبقي شيء تبكوه
إذا كان الميزان مقلوب
ف يبقى العرض حقه الدّم
ولو ما نفعش حذف الطوب
هتبقى البندقية أهم
هتلقوا ع الوطن مكتوب
«لا يؤخذ عن طريق القم»
يا إما تشمروا الأكمام
عشان تاخدوه
يا إما توطوا على قدام

IV

عن الانتماء الأولى.. ومفهوم الدولة

الملح والسُّكَّر نفس البياض إزاي؟
والورد أحمر زي لون الدَّم
أعرف منين الضحكة دي من فين؟
وإن كنتي ضحكة فرح
ولَّا انتي ضحكة هم

من قواعد الدائرة السبعة

قاعدة ٤

كل الطُّرُق ف الكون
بِتلفّ على واسع
ف مفيش نفر فاكر
إزاي رِجِع أو لَفّ
شُوف الإله حكمتُه
في الدائرة عاملة ازاي
وازاي محجِّمنا
من غير ما يعمل سقف

المولوية

أنا لَزَقَ إِتْشالَ خمسين مرَّة
مِنَ فوقِ خمسين نُوتةً وكشكول
وإِتْسابِ فِ الهَوا عريانَ بَرَّه
فِ نشف.. ما بقاش يلزق على طُول
- هُوَّ انتا تطول؟

قاللي الدرويش
مش عايز أطول.. أنا عايز أعيش
- إنتا اللي فهمت الزهد بلاء
إزاي هزهد فِ حاجات ما عيش؟
- يا حمار دي فضيلة الاستغناء
وانا كُنت استغنيت بِمزاجي؟

وَمِنْ غَيْرِ سَارَةَ
وَمِنْ غَيْرِ الْبِنْتِ اللَّيْلِ أَنَا نَفْسِي أَجِيبُ مِنْهَا وَوَلَادِ
وَمِنْ غَيْرِ فِيزَا الْبِنْتِ الْأَهْلِيِّ
وَهَشُوفٍ مِنْ غَيْرِ النَّضَارَةِ
عَايِزُ هَوَا بَسْ.. وَمِيَّةٌ.. وَزَادِ
كُلَّ يَوْمٍ.. بَكْبَرٍ وَارْمِي حَاجَاتِ
وَاكَتْشِفْ إِنْ أَنَا.. كَانِ مُمْكِنٌ أَعِيشِ
مِنْ غَيْرِهِمْ أَصْلًا مِ الْأَوَّلِ
مَا أَعْرِفُشِ بَقِي الْيَأْسِ اتْحَوَّلِ
وَقَلْبِ عَلَيَّ زُهْدِ
وَلَا دَا جِينِ صُوفِيٍّ مِنْ الْأَوَّلِ مَشِ مَحْتَاجِ جِهْدِ؟

...

عَلَّيْتُ صَوْتِي وَقَلْتَلَهُ مَا تَرِدِ
الدَّرُوشِ أَصْلًا مَشِ مَوْجُودِ
الْجَامِعِ فَاضِيٍّ وَمِتَغَيَّرِ
فِيهِ عَيْلِ شَبْهِِي وَأَنَا صَغِيرِ
شَايِلِ بَلَطَّةٍ وَيَبْهَدِ عَمُودِ
مَشِ عَارَفِ أَحْرَكِ رِجْلِيَا

أَنَا اسْمِي يَسْتُ وَمَا اسْتَعْتَشِ
إِيهِ الزُّهْدِ فِ إِنْهُ أَمَّا أَجِي
أَشْتَرِي مَا بَجِيشِ عَشَانَ مَا لَقْتَشِ؟
فِيهِ فَرْقِ مَا بَيْنِ صَبْرِ الْعَاجِزِ
عَلْشَانَ مَا بَقَاشِ حَاجَةَ فِ إِيْدِهِ
وَبَيْنِ وَاحِدِ أَصْلًا مَشِ عَايِزِ
غَيْرِ زِي مَا بَسِ يَعْوُزِ سِيْدِهِ
صَدَقْنِي أَنَا زَاهِدٍ بِالْصُّدْفَةِ.. أَوْ مِنْ غَيْرِ قَصْدِ
أَنَا طَايِرِ آه.. لَكِنْ عَلْشَانَ مَشِ لَاقِي الْأَرْضِ
صَدَقْنِي أَنَا كَانِ نَفْسِي أَتَعَلَّقُ.. فِ حَاجَاتِ يَا مَا
وَأَعِيشِ إِحْسَاسِ إِنْ أَنَا فَعَلًا مِنْ غَيْرِهَا هَمُّوتِ
أَنَا أَعْرِفُ أَعِيشِ

مِنْ غَيْرِ مَا أَحْتَاجُ إِنْهُ أَقْرَأِ الْوَقْتِ
مِنْ غَيْرِ وَلَا وَاحِدِ.. مِ اللَّيْلِ أَنَا أَعْرِفُهُمْ دِلُوقْتِ
أَنَا أَعْرِفُ أَعِيشِ مِنْ غَيْرِ اسْمِي
أَوْ سَتُوفِ بَرِّهِ حُدُودِ جَسْمِي
وَمِنْ غَيْرِ السَّلْسَلَةِ وَالْمِفَاتِيحِ
وَمِنْ غَيْرِ وَلَا وَاحِدِ مِنْ أَهْلِي

فيه ناس واقفين
شايلين ف حاجات
ناس غيرهم شايلين بني آدمين
فيه منهم ناس شبه العيلة
ومفيش غيري من غير شيلة
ف محدش عارف غيري يطير/
أنا عمّال أترقي وأطلع
الشُّبورة عمّالة تضيع
على مد الشوف.. أنا شايف بيت
وبتمتم بكلام مش واضح
فيه صوت بيقول «على فين رايح؟»
ف بشاور.. ف يقوللي «لوحذك؟»
ف اضحك واشاور حواليا
لولا إني لوحدي
ما كنتش جيت

ومش عارف أصرّحله يبطل
صوت دُف بيعلى وبيقرب
دقات ورا بعض
وعمود الجامع يشقق
ويعمل أصوات زي الرعد
العيل يسرع أكثر
زي المسعور
أكثر أكثر أكثر
فيه نور ضارب ف عنيّا
وألوان بتدور
كل اللي أعرفهم حواليا
السقف خلاص كله بيتهد
فجأة مفيش في الجامع ولا حد
وبحسس على وشي كويس
وبشوف الدّم
وببص لفوق
السما باينة منورة جدّا
ومفيش عصافير

ثم دارت اللمونة

ثم دارت اللمونة
دورة كاملة.. ثم دأخت
ثم جه إخواننا ولاؤنا
ثم إن الثورة بأخت
ثم همما همما برضه
إللي باعوا الطول وعرضه
يصحوا يتخانقوا ويعارضوا
ثم إن الرّيحة فأحت
ثم مش نازلين معاكو
ثم إن الجيش حمونا
ثم تاخذوا على قفاكو

قلّب ف قديمك وجديدك
تلقى الموضوع كله في إيدك
بتعيد نفس الحركات ف الدور
وبتستغرب لما يعيدك

ثم دارت اللمونة

...

ثم قال هُنْزَل لِيُوحْدِي

ثم دقن ف كل حته

ثم يعمل مليونية

ثم يمشي الساعة ستة

ثم يعمل فيها عتتر

ثم ياخذ علقة سُخْنَة

ثم هيخزوقنا عَسْكَر

ثم يطلع من نافوخنا

ثم فيه أصلاً مؤامرة

ثم ناس مش لاقية تاكل

ثم تيت الثورة حمرا

إحنا مش عايزين مشاكل

ثم دارت اللمونة

دورة أكبر.. ثم دخنا

...

ثم فجأة الكُل يتعب
ثم إن الجيش هيقتل
ثم احنا حمارنا يغلب
ثم جيم الدومينو يقفل
ثم مصر عاوزة رَقَّة
ثم ناس ما تقولش لأه
يركبوا ع الثورة تاني
ثم نخسر.. ثم نكسب

دولة الثوار

إخشوشنوا علشان
المعركة خشنة
سدوا الفرج بينكو
حاذوا القدم والكتف
ضمّوا عشان نعمل
من وسطنا جيشنا
تار الشهيد ناخده
قبل أما دمه يجف
ما تدخلوش بينّا
خاين عشان نكثر
إللي هرب منّا

يا رب لا تبتلي رُبْعنا بالتلات تربع
ولا تبتلي يا رب قِلْتنا بالغالب
لا تبتلي يا رب شعبنا في وطنه
طول م عدد جُؤاه
لِسّه مهوش سالب

إللي انضرب بالنار
ولا اسم شيخنا عماد
إلا ابا بقی له تار
ولا كشف مُعتقلين
أتاخذوا مِن بيننا
ولا مين رسم ع الحيط
غير إنه واد منّا
معرفش غير دَر بكم
والمشي في رَكبكم
واعيش واموت وسطكم
يا دولة الثوار

مِن غيره نبقي أكثر
ما تسلّموش ضهركو
غير للّي كان جنبكو
مش للّي باع عرضكو
بالكرسي للعسكر
يا شهدا ما اعرفهمش
لاكن بقوا اصحابي
مِن كتر ما بشوفهم
في النشرة والجرانين
يا وشوش ما بقابلهمش
غير بس في الميادين
مين فيكوا يعرف مين؟
ما اعرفش أساميكو
ياللي على الجبهة
ولا مين رمى القنبلة
ولا مين جري وسابها
ولا نمره أم الواد

وَطَى عَلَى وَدْنِي فِ قَلْبِ الْمَسِيرَةِ وَقَالَ:
 كَدَهُ يَبْقَى فَاضِلٌ .. كَامَ شَهِيدِ عِ النَّصْرِ؟
 كَدَهُ يَبْقَى فَاضِلٌ أَدِ إِيهِ عَلَى مِصْرٍ؟

مِين بَقِيَ فَاضِلٌ مَعَاكَ؟
 حَبَّةٌ بَاعُوا لِلْيَهُودِ
 حَبَّةٌ بَاعُوا لِآلِ سَعُودِ
 وَأَنْتَا يَا شَعْبِي كَعَادَتِكَ
 عُمَرُ مَا حَدَّ اشْتَرَاكَ
 مَشِيُوا أَصْحَابُ الْمَصَالِحِ
 وَمَشِيُوا ثَوَارُ السَّوَاكِ
 وَالْمِيدَانُ دَائِمًا كَعَادَتِهِ
 مَشَّ بِفَضْلٍ فِيهِ .. سَوَاكَ

من قواعد الدائرة السبعة

قاعدة ٥

إزاي تعرف

مين سابق مين جُوا الدائرة

ومين فيها قطع أطول مشوار

مش ممكن برضه اللي ف ضهرك

يطلع سابقك

وانتا اللي حمار؟

خمس خمسات

الماضي ييمضي حضور
يومياً ف الكشوفات
مين قال امبارح فات؟
أنا لسه مقابله امبارح
بيخوف واحد ماشي
م الشارع بعد الجاي
بيقطم واحد حي
ويندم واحد مات
وساعات يو عظ وينظر
وساعات يضحك ويهزر
وساعات واحد مش فاكره

وساعات يسيب علامات
من يبجي يومين بالظبط
وانا ماشي خبطت ف مين؟
فاكر داليا ونرمين؟
الحاج أبوهم ماشي
قوم فجأة لقيتني ف وشه
وإزيك ومش إزيك
- أحوالك؟

كله تمام

- الواد محمود بقى زيك
- طول ما هو قاعد بينام
يا غسل .. سلملي عليه
- يوصل .. وبقولك إيه
- فاضي نتمشى شوية؟
طبعا .. محسوبك عاطل
- أنا عارف إن كلامي
- عمره لا قدام ولا آخر

- وخايف أطول تتأخر
- لاكن محتاج أتكلم
- ومش لازم تبقى ترد
- مسكوا عيال شاربة إمبراح
- السوق ما بقاش ولا بد
- يتشوف إخوانك؟
لا
- شفت الأخبار بالحق؟
ونطلع من حاجة لحاجة
كوباية شاي ع القهوة
على ساقع م التلاجة
نخطف مشوارع الكوبري
نركب أتوبيس للآخر
ونخرم من قدام
وكلام بيعجر كلام
الراجل ده .. كان ساكت
طول عمره لحد ما فجأة

علشان كات داليا تحبه
مع إنه ما كانش يطيقه
البيت قُدام الجامع
عَدِّني معاك معلش
عم حجازي ما عَجَّز ش
لاكن م اليوم إِيَّاه
بيخاف لِيَعَدِّي الشارع
دايمًا بِيَعَدِّي وسامع
صوت الفرملة ف ودانه
نرمين قُدام التاكسي
بِتَعَدِّي وَهُوَ مكانه
وفجأة ما بقتش مَعاه
بَعدين ما بقاش فيه بنات
مش فاكر آخر حاجة
مِن نرمين أو م الدنيا
غير ريحة صنف كولونيا
بِيَفكِّرني بِأَموات

وبدون ولا أي سوابق
جت حادثة ونرمين ماتت
بَعدين لحقتها الحاجة
وداليا اشتغلت في فرنسا
وف ست شهور أو خمسة
ما بقاش موجود في الشقة
غيره.. هُوَّ ومحمود
محمود كان لِسَّه صُغير
لاكن فيه شيء اتغَيَّر
بِينام أكثر ما بِيصحي
وأبوه ما بقاش بِينام
يفضل صاحي لأيام
طُول ما هُوَّ صاحي بِيَتكَلَّم
مع ابنه بِدال الحاجة
اللي ما شافِتوش غير ساكت
يومياً يفطر نابت
مِن غير ما يَغَيِّر ريقه

كل الغايين م الحاضر
يسيبوا دليل إثبات
على إن الماضي بيمضي
يومياً ف الكشوفات

أنا زاهد زِي
جوكر زاهد في الكوتشينة
أو شارع زاهد في الماشيين
أنا واحد حي
مُضطر يعيش ف الفاترينة
ويكره جمهور الفتارين

والتعالب سَمُّوا نفسهم مندويين الرَّب
أما الغلابة اللي بنوا الغابة
كانوا بيصحوا بعد كل مَطَب
يدعوا ف أدان الفجر ويقولوا
يا رب يا مَنَّان
أحمينا م الخوَّان
نَجِّينا م الشرير
وأنصرنا ع الدَّبابَة

دعاء الدَّبابَة

كان الزمان أيامها شبورة
والدنيا كانت تشبه الغابة
وكانوا الدَّبابَة
لِسَّه يلبسوا كاكبي
والقاضي كان أيامها بالأجرة
والكُرسى كان أيامها ملاكي
وكانوا الغلابة لِسَّه زِي الرُّز
كانوا كَتير إنما.. كان قلبهم أبيض
لو يزعلوا يهتفوا... أما الأسد بيغزُّ
والحق أيامها
كان لِسَّه من غير أب

بند عيلكو

يا شايلينكو على الاكتاف
بنعي دمكم بهتاف
وندعيلكو
غموس الناس وعيشها الحاف
بيدعيلكو
و درس العربي ف الأرياف
بيدعيلكو
وكل جنيه زيادة ف جيب
موظف هيئة الإنتاج
وابني اللي ف علم الغيب
وأمي اللي هتلقى علاج
وأرض المعتقل لَمَّا

نوعين م الناس
بياخدوا الدنيا بالعافية
يا ناس ناجحة
يا فاشلة بس مَعْمِيَّة
وانا اهبل لِسَّه بَقْنَعَهَا
تَسَلِّم نَفْسَهَا لِيَّا

هتفضى .. أكيد هتدعيلكو
وكل ظلومة ما اتظلمتش
وكلمة حق ما اتكتمتش
وكل قلم نقص ف القسم
وكل علامة مش ف الجسم
بتدعي لكل وش وإسم
من اللي عندكم .. منّا
يجوز هيكونوا من جيلنا
يجوز هيكونوا أولادنا
يجوز هيكونوا م الاتنين
لكن ندرن عليا ودين
لا تيجي عيالنا تشبهكو
تبوس على رجل أصغر شاب
وترفع رايته زى ما حَبّ
وتحفظ صم أساميكو
ومن آخر نفر فيكو
لأولكو
هتدعيلكو

السلام عليكم
يا اللي سبتونا ونزلتم تحت
السلام عليكم
يا اللي سبتونا وطلعتم فوق
ما بيكيناش ف غيابكم إلا الشوق
وما نفهموش من ضحكتي إني ارتحت
لو حد فينا ارتاح
يبقى اللي بيغمض
ساعة الفراق .. أما انا
ساعة الفراق .. فتحت

عن ندوب محمد محمود التي لا تزول

مَثَلُ الَّذِينَ بِيَمَشْوَاعِ الْكِتَالُوجِ
 وَيَعْمَلُوا الْمَطْلُوبَ.. مِنْ غَيْرِ وَلَا غَلْطَةَ
 مَثَلُ الَّذِينَ يَبْرِكِبُوا الْمَتْرُو
 وَمَا يَرِكِبُوشِ اِنْتَاَشِرِ وَأَرْبَعَةَ بَشْرَطَةَ
 لَاتْنِينِ مَا يَبِحْبُوشِ.. الْقَعْدَةَ عِ الدِكَةِ
 وَيَبِكْسِبُوا وَقْتَهُمِ
 وَيَبِخْسِرُوا السِّكَّةَ

من قواعد الدائرة السبعة

قاعدة ٦

الصدق الخالص .. خالص
والكذب المحبوك جدًا
عُمرُك ما هتُعرف تُعرف
الفرق ما بين الاثنين
اتنين بيلفوا ف دايرة
واتقابلوا ف نفس النُّقطة
مع إن ف أول لُقطة
كانوا ماشيين ف اتجاهين

سِيْب

دائمًا على قدِّ ما تتساب.. سيب
وعلى قدِّ ما واحشك أحباب.. غيب
كُلِّ الدَّائِنِ.. كان متداين
والدين بيِّلف بدون ترتيب
أنا عمري ما كنت بجرِّح قصد.. لحد ما قلبي اتجرِّح قصد
أنا جاني وقاضي ومجني عليه
وظلعت براءة ف حُكْمِ النِّقْضِ
أنا دومينو ف صف و مش قصدي
كان نفسي أسند قمت مَوْقِعَ
أنا شايِل قلبي ف محفظتي
وأول ما تجيلي فلوس بدِّفع

أنا عادي ودوري ملوش سو كسيه
بَس دي أرزاق.. والدُنيا نصيب
عُمر ما فيه عادي ييسأل ليه
م الأصل إتساب.. أوليه هيسيب

مين اللي قال
البصمة شيء مخلوق عشان
عقد ابتدائي وفيش جنائي أو ورق
البصمة بتقولك إيديك.. فيهم حاجات
مش موجودين مع جنس مخلوق اتخلق

والحيّ.. والدُّخان
أكذب عليك لو قُلتك نَدْمَان
لاكن انا عيَّان... بِحُبِّ الوطن
وبِذكريات المعركة الدَّائرة
وبِخوفي م النسيان
وبِحُبِّكَ إنْتِ كمان

ورق النتيجة

أنا وانتِ عشنا سوا
أيام يمكن ما تتعوضش من تاني
شُفنا التاريخ.. وهُوَّ بيتكتب ع الهُوا
وسبنا الهوى يضربنا ف الخلاط
ما اعرفش بِكُتيلك من الإحباط
ولَّا الأمل
معرفش إيه العمل
ف ريحتك اللي مغرّقة ورق النتيجة
وف الأيام المتعلِّمة بمزيكا
وف الشال اللي شال دَخنة وشياط وعياط
وفوارغ المطاط

من هوامش السيرة غير الذاتية

لمحمد محمود

لا الأرض كانت هيّا نفس الأرض
ولا وقتها كان الهوا هُواه
شوف أولياء الله
طالعين من الدُخان
يتيمموا بالطوب
ويتّمّموا على بعض
بيعيّطوا م الشجاعة ما يعيّطوش م الخوف
ورايتهم الحمرا.. مرفوعة مرمى الشُوف
وبيهتفوا للتار.. من جُوا حَط النار
بيمجّدوا بينهم.. إللي انقتل أكثر

كما كُنتم

بتتمنوا الحياة تطوّل
عشان فاكرينها جايبة جديد
كرهتوها
عشان طلعت مهيش فارقة
هترجعكو بالتحديد
كما كُنتم

وبيشرواف دينهم.. بميلاد وطن أكبر
ورغم انهم دايقين.. خطر الطلوع قُدَّام
لاكنهم عارفين
إن الرجوع.. أخطر

يعني أنا لو مِنَّاك بصراحة
وقَلَّبْتِ الصناديق عرض وطول
وما لقيتش اللي أنا كان نفسي ألقاه
هَفْضِلْ سايب صندوق مقفول
وهَقُولْ بالتأكيد كان جُوَّاه

كِعِشِقِ المِوسِيقِى لِواحدِ أَصمِ
كِعِشِقِ الكِراسِى لِواحدِ ما جاشِ
كِعِشِقِ الوظيفِة لِسِنِ المِعاشِ
كِعِشِقِ اللِى تابوا
عَنِ الزَّهَرِ فِجاءَة
وِعِشِقِ المِفاجِةة لِدورِ ما انتِهاشِ
كِعِشِقِ الحِياةَ لِلى فارقوها بِدري
وقدَّ اشْتِياقِ الكِفنِ لِالشَّهِيدِ
بِحِبِّكَ جَدِيدِ

كِعِشِقِ الكِراسِى لِواحدِ ما جاشِ

يا رِيحَةَ شِىكاغِو فِ ساعَةِ العِصاري
يا بِيرِوتِ بِحِبِّكَ ومِعايشِ مِصاري
فِ مِوسكو اسْتِويتِ مِ البِياضِ والجِليدِ
فِ لِنَدَنِ عِمانِى الضِبابِ الشِّديدِ
يا رِيحَةَ زِمانِ جُؤا طِهرانِ وفارسِ
يا شِكلِ التِلامِذَةِ فِ بَكينِ والمِدارِسِ
يا رِيحَةَ البِارودِ فِوقِ حُطامِ المِتارسِ
فِ غِزَةِ وطِعمِ التِرابِ والحِديدِ
بِحِبِّكَ جَدِيدِ
زِى حُبِّ المِدينَةِ
لِواحدِ يِعرِفُها غِيبًا وصَمِ

VII

شهادتي عن أحداث كربلاء

دور البرد اللي يجيك مرّة
بيموت ويسيبك للّي ماجوش
ف بلاش خوف لا تعيد الكرّة
وفرّ خوفك للّي ما شفتوش

من قواعد الدائرة السبعة

قاعدة ٧

ف الدائرة مفيش واحد بيتوه
غير اللي يقرر يوقف لَفَّ
ف اللِّفَّة مفيش واحد مجروح
إلا اما آخرها بتلقاه خَفَّ
ف خلاصة القول
عيش عرض وطول
وما تخافش من الموت والخرابيش
هتخاف وتوقَّف لَفَّ.. تموت
هتراهن وتكَمِّل
...
هتعيش

ديالوج

(١)

- قالت الدنيا للولد ف الفصل
يا تعيش بتكتب ورايا
ف الحصاة يا تعيشها
إنسى ان فيه ف الفصل سبورة
- قال المصور للّي جاب كاميرا
يا تعيش بتأخذ صور
للّقصة يا تعيشها
الكادر دايمًا أغلى م الصورة
يا دُنيا انا بكتب
للجاي بَعْدِيَا

حتى أنا
قَفَشْتُ نَفْسِي مِنْ يَوْمَيْنِ بَضْحَكِ
وانتا ما كَمَلْتَش يا صاحبي ف التراب .. أول سَنَة
وَحِلْمَتِ بَعْدِيهَا بِسَاعَةِ الصَّالُونِ
وَبِإِنْ عَقَّارِبِهَا ابْتَدَتِ تَأْكُلُكَ
وَأَنِي بَرَّاجِعُ مِ الصُّورِ شَكْلَكَ
حتى هدومك نَسِيتِ الرِّيحَةَ
ما اعرفش خايف أصدق .. إن أنا نَسِيتِكَ
وَلَا إِنِّي بُكْرَةَ مَسِيرِي هَاتُنْسِي .. زَيْكَ؟

وانا جاي بَعْدِي أَلُوفِ
وان كنت بَأْخُدِ صُورِ
لِلْقِصَّةِ مِش لِيَا
ف انا نفسي غيري يشوف

(٢)

قال الولد لِرِفاقته ف المعتقل
بُوسُوا الْمَسْدَسَ وَاحْضَنُوهُ وَنَامُوا
العار لمن داموا
والمجد لِّي اتقتل

(٣)

قال الكلام ده ثم حَطَ الكاس
«الغياب هو الغياب»
والذكري ف قلوب الصحاب .. أبقى
أبقى النهارده معاكم بُكْرَةَ مِش هَبَقِي
والدنيا سابقة بخطوة كل الناس

إني رأيتُ اليوم

(فيلم شعري)

الزمان

أيام ما كان

لِسَّه فيه ناس

ممکن تموت

مش لَجَل لُقمة و لَجَل قُوت

يعني الزمان

كان من زمان

المكان

جُؤا العراق

صَحرا على مَد البصر

هتقولوا قلة.. هتقولكوا وبنقل

بنغربل الأوساخ.. وبنديها لكوا مدد

بتسيينا ناس في الشمس عشان تقف ف الضِّل

وسيدنا الحسين منصور.. عُمره ما هُمَّه عدد

رَملة بدون نقطة مطر
والكوفة على رَمية حَجَر
مِن كربلاء

...

الـ «scene»^(١) يبدأ

صوت نَفَس

مزيكا تُوحى بِالقلق

دقات لقلب يبتفض

منظر لِحَبَّات العرق

على جبهة م الشمس إستوت

الكاميرا تعمل زووم أوت

الـ «scene» بدأ

...

أصوات حوافر ع الطريق

الصوت يعلو ويقترَب

فيه نقطة ع الشوف من بعيد

(١) scene: مشهد.

الزووم يزيد

يظهر بتاع ٥٠ فرس

مِن لِسُهُم

واضح يان دول حرس

مِن جيش يزيد

* * *

يعمز حُصانه ف ينطلق

زَي الهوا

تلمح عِينِهِم.. م العُقارة جَرِيته

تلمع عِينِهِم

كُلُّه يجري ناحيته

مَشهد مُطاردة بدون أمل

خَلْفِيته

صُوت طَبَل أفريقي إشتغل

ومفِيش دقيقة بعدها

كان سَهَم لِحقه

وإتقتل

* * *

ف يسبب حُصانه ويتهدد

يمسك السَّهم بإيديه

ويشوف شريط الفيلم كله قُصاد عينيه

الشاشة تَبَهَّت لون ضباب

علشان تجيبه بيفتكر

والذكريات دايماً بتصحى

لما نيجي نحتضر

...

...

...

كُنَّا قُصاد قصر الخليفة بِالآلاف

مِن كل شارع ف المدينة

هتلاقينا

شيء مَهول

...

ومهما أحكي أو أقول

اللي سمع

طبعًا مهوش زِي اللي شاف

كان هُو جُؤًا بِيرتعش

وزِي منه حاشيته

طوفاننا عمَّال يقترب والكل جاي ف سِكَته

والكاميرا طيارة ع الرؤوس

مع صوت هتاف

* * *

الصورة تعمل «fade out»^(١)

كل الملامح تختفي

الصورة ترجع

الإضاءة.. نور قمر

والمشاعل اللي باقية

نورها قَرَّب ينطفي

واللي فاضلين م الآلاف

يتعدُّوا يمكن ع الأيدي

ما اعرفش لِسَّه الغلطة فين

* * *

(١) fade out: إظلام تدريجي للشاشة.

بَسَّ الحسِين

لازم خبرنا يوصله

قبل ما يفوت الآوان

خوفنا خلانا عبيد ملناش أمان

إحنا مش قد اللي عاوز يعمله

وصوتنا النهارده جنب صوتّه

وموتنا موتّه

وبكرة قدام الخليفة

إحنا اللي ممكن نقتله

...

...

صمت تام

...

بعده يبدأ صوت بيان

صوت لعزف حزايني جدّا ع الكمان

«scene» المظاهرة خلاص خالص

و«scene» العقاب

واضح إنه ف أوّله

الكاميرا فجأة تلتفت

جايبة شكل القصر كُله

من بعيد

زووم ع الفراندة

اللي طاله ع الجنيّة

من وسط طباط حاشيته

يظهر يزيد

زي اللي دبت روحه جواه من جديد

يكشف سنانه ويتسم

وبسيفه يشاور علينا

من غير ما ننطق كلمة واحدة

ف ظرف لحظة

افترقنا

كل واحد ودّع الباقيين بنظرة

وهو بيلف بحصانه

وانطلقنا

الحركة ماشية بالبطين
الكاميرا تَعْلَى لِفُوق أوي
الصَّحْرَا تَمَلَا الكادر كُله
...

والشمس.. ف نهاية الطريق

* * *

ع الضُّهْر حَسَّيت بِالتَّعْبِ
بَطَّلْت جَرِي

الشمس حامية

وصدري من كُتْر العَطَش عَمَّال يَضِيق

رِيقِي بِحَاوَل أبلُعه

مَش لاقِي رِيق

حَسَّيت سَاعَتَهَا ان النِّهَايَة بِتَقْتَرِب

ف نزلت مِن فُوق الحُصَان

طَبَّطبت على كَتْفِه وَسَنَدت

وَبِنْظَرَة بَصَّيت لِّلسَّمَا زِي الغَرِيق

* * *

كُلُّ واحد ف اتجَاه
كُلُّ واحد منا يَجْرِي
وَألف كلب صِيد وَرَاه
ما اعرفش مِين فينا اتصلَّب
مِين انضَرَب

مِين فينا بِالْمَدْنَة إِحْتَمَى

مِين اللِّي من فُوقهَا إِتْرَمَى

أَوْ حَتَّى مِين قَتَلَه العَطَش

بعد أَمَا تَاه

كُلُّ الشَّوَارِع مَصِيدَة.. وكُلُّ البيوت

الكُوفَة نايمة

حَتَّى مِن قَبْل العِشَا

حَطَّت صُبَاعَهَا ف وِدْنَهَا

وَسَابِتْنَا بَرَّه البَاب نِموت

اللَّيْل يَفوت

وَالْحِظ يَلْعَب لِعَبْتِه وَيَسِينِي أَعِيش

الكاميرا قُدَّام الحُصَان

الصورة تثبت بتاع أربع ثواني
الصورة فجأة تجري بس سرعة جدًا
مع صوت كأن حد يسف الشريط
الصورة تثبت مرة تاني
جثة فوق الرمل نايمه
سهم راشق نفسه فيها
زي شاهد من فوقها
الكاميرا تبعد حبة حبة
والإضاءة تنطفي
أصوات نايات
ملو السمع
والكادر ييلم الوجة
بعدين يقرر يختفي

* * *

صورة سودا للسمما
من غير نجوم
مع صوت هوا عمال يزوم

فوق الرمال
وتبان بعيد أشباح جمال
أصوات خفيفة للخبول
ينزل كبيرهم
من على جناح الفرس
ويلف كفه ع اللجام
بعدين
يقول
الليلا دي نبات هنا
دقوا الخيام
...
ساعتين وكان الكل نام
يصحى ف نص الليل لوحده م القلق
ابنه الصغير يسأله
- مالك؟
- مفيش
- هو احنا مش ع الحق برضه؟ ... يبقى تفرق إيه نعيش؟

تلمع عيونه بدمعتين
يحضنه دراع الحسين
والحضن دايماً يَخْتَصِر
نُص الكلام

يا رب مَغْلُوب فانتَصِر
الظلم عُمره ف يوم ما دام
وتفوت ساعات الليل قوام
الفجر

يبدأ يوم جديد
وينكُتب ع الشاشة
بِالفونظ العريض

«يوم كربلاء.. آخر ساعات قبل المصير..»
والكاميرا تتسحب على الـ «scene» الأخير
قبل الختام

* * *

الكاميرا جايبة صَقْر طائر فوق بعيد
عمَّال يلف ويرسم دائرة مقفولة

وكأنه حاسس باللي هينقتل تحته
وان الحسين على وش مَدبحته
وان الرمال تحتيه.. بِالدَّم راح تشبع
وان الهَوا حَواليه.. حبة وهيبقى تراب
وهيبقى هُوَّ وُصُحبتَه أعراب
وان المَدَد مش جاي
مش هُوَّ ده علمهم
إللي قالولك تيجي رجعوا ف كلامهم
يا حسين هتيجي تموت لمين.. ارجع
كل اللي جاي علشانهم
تفدي وتناضل
راضيين يعيشوا عبید
والمشهد الفاضل
هَتموت ف آخره وحيد

* * *

الشاشة تَتَفَتَّح
بِالراحة ع المشهد

الصورة سُودا

وتاريخ يطلع يَنْكَب بِأَبْيَض

الزمان

عشرين ديسمبر

شهر ونكَمَل سنة ع الثورة تقريباً

الوقت.. قبل الفجر

المكان.. أسفل إشارة عمر مكرم

جَنب الصينية تحديداً

ويخش آخر كادر

ف القصة على غفلة

«fade in»^(١).. على الكريشندو^(٢) والقفلة

...

أصوات هتاف

ويتقطعه أصوات بعيدة.. لِسْرَاين الإسعاف

وساعات قريبة لضرب نار

(١) fade in: ظهور تدريجي للصورة على الشاشة.

(٢) الكريشندو: مصطلح يستخدم في الدراما والموسيقى للإشارة إلى تصاعد

الأحداث أو درجة الصوت حتى وصولها للذروة.

الكاميرا بتزووم ع الهدوم الكاكي

والكادر فجأة فيه بَشْر ظهروا

صَفَّين عساكر جيش.. مترصصين بِالْعَرَض

وبلاط رصيف الحي

مخلوع ومِتَكَسَّر

والراوي يبدأ حكايته وصوته متأثر:

أمسك محمد مصطفى ع الأرض

وأبكي وانا بقلبه من كتفه على ظهره

ونشيله جري فاشيله من بَاطُه

وصوابعي حاسة بقلبه بيددق

مع كل نبضة تخف نبضاته

كان دمه مش بينقَط

دمه بيدلِدق

قالوا الدكاترة بعدها

إللي اتقطع

شريان مُهم

...

زَعَقَ بصوت رايح .. وبحشرجة ف الحلق
وأسكت عشان ما بقاش .. فاضل كلام يتقال
...

الكاميرا ماشية بالبطيء جنب الصينية
الكاميرا ماشية بالبطيء
فوق الطريق الأحمر
بتودع الواقفين ف الكادر وبتطلع
وأصحاب محمد
لِسَّه ييحاوطوا الأمل
بِالطوب
زَي ما يحاوطوا
أتر الشهيد المحتمل
ع الأرض
أفتح وَصيته وأقرا إيه مكتوب
الكاميرا طيارة ع الميدان من فُوق
والصوت یرن لِوَحده .. في سَمَا المنظر
...

المُهم
لَقِينَا وسطه بِشال
وعقبال
ما جرينا للشارع
ولقينا عربية
ولحد مستشفى الهلال
ولحد ما استلموه .. طقم النبطشية
كان هُوَّ متبرِّعٌ بِنُصِّ دمه للطريق
وعرفنا بعديها بيومين
إِنَّه جِه اتبرِّع بروحه
للقضية
وانه ساب لِصُحَابَه ف هدومه وصية
الكاميرا جايبة شاب بيغرق إيديه بِالدَّم
وجايبة صاحبه مِعْدِي جنبه ييدمَّع
بيقول كلام ويعيده كأنه بيسمَّع
- شيع صحابك من معركة بالليل
والصبح فرَّج دمهم للخلق
ولآتوييسات الناس الرايحة للأشغال

إني رأيتُ اليوم.. الصورة من بَرّه
وقُلتُ الحسين لِسَنّه.. هيموت كمان مرّة
إني رأيتُ اليوم.. فيما يرى النائر
إن الحسين مَلُوم.. فوق جُثته عساكر
يبدغذغوه بِالشُّوم.. كُلُّ أمّا يجي يقوم
وإن البشر واقفة.. تبكي بِدال ما تحوش
وإن العلم مصفاة.. م السونكي^(١) والخرطوش
وإن الطريق مَفروش.. بِالدّم للآخر
إني رأيتُ اليوم.. الدّم ع الأيش^(٢)
وإن الحسين إحناء..
مهما اتقتل.. عايش

(١) السونكي: خنجر يثبت في ماسورة البندقية يستخدمه جنود المشاة في القتال عند الالتحام.
(٢) الأيش (القايش): حزام الجندي.

مانيفستو^(١)

(م)

- ماسبيرو أخطر م الرصاص والقصر
- مَلّي عينيك بِالدّم.. قبل الطلوع قُدّام
- ما تسيبش جيشك تقسمه الأعلام
- مش كل مين جنبك.. جُواه بيهتف مصر

(١)

- الوقفة جنب النار.. بتقلل الدُّخان
- اهتف هتاف ابن المكان والظرف
- اضرب بعزمك.. أو ما تضربشي

(١) مانيفستو: بيان عام بأهداف الحركة أو التنظيم وسياساتهما.

- ارجع بضهرك.. أو ما تهرشي

- امسك عصاية ثورتك م الطرف

- التاريخ ضمن الغنaim.. ويكتبه الكسبان

(ن)

- نقيّ دايماً طوب صغير حَدْفَتِكَ توصل بعيد

- نفترق ساعة المطاردات.. أربعات

- نَشْن الباراشوت^(١) ناحية الصف العريض

- نجري فجأة.. نرُد فجأة.. نُص قوتنا المفجأة

- نَدّم اللي يعورك.. واقطعه إيد

(ي)

- يؤتى الحذر من مكمته

- يأتي الغبي باللص ثم يحلفه

(١) الباراشوت: الطلقة المضئة التي يطلقها البحارة في الهواء عندما توه السفينة أو تعرض للخطر وتطلق في المعارك أفقيّاً لتسير بشكل زجاجي بغرض تفريق الجموع.

- يؤتى الهتاف.. رجاً بممن يهتفه

- يؤتى الجدع.. قلباً بمما اتجدعنه

(ف)

- فَرَّق ما بين.. الجرأة والقلب الحديد.. والرمي جَوًّا
التهلكة

- فَتَّش بإيدع المستفيد.. وبإيدع عن صاحب الجدع

- فَتَّح إذا الناس غمضت.. غَمَّض إذا نظرك خدع

- فَرَّغ عياطك ع الصحاب.. دم وخميرة.. مش بُكا

(س)

- سَمِّي الحاجات دي باسمها.. الكذب.. والخوف..
والخيانة

- سِجادة المسامير.. تتحطع الناصية.. غَطَّيْهَا بالدخان..
وَلَّع قصادها كاوتش

- سِد الطريق لورا علشان ما تترددش

- سِيب باب لجيشهم يهربوا منه

- سَلِّم رايات الحلم لحد من سنه

- سَلِّمْ قَرَارَكَو لِأَكْثَرِ كَفِّ عِرْقَانَةِ

(ت)

- تَبَّتْ يَدَا مِنْ سَابِ رِفَاقِ الْمَعْرَكَةِ بِطَوْلِهِمْ

- تَمَّنَ الْقَضِيَّةَ اللَّيْلِ أَنْدَفَعَ مَا بَقِيَ مِنْ يَجُوزِ يَرْجِعُ

- تَتَعَبُ تَبْصُفُ عَيْنِ.. أَصْحَابِكَ الطَّيْرَةِ.. شُوفِ مِينِ

مِنَ الْآخِرِ دَفَعَ.. لَوْ زِيَّهِمْ.. ادْفَعْ

- تَلَّتِ الرِّصَاصَ نَحْوَ الْعَدُوِّ.. تَلْتَيْنَهُ لِلْخَائِنِ.. الطَّعْنَةُ جَايَةٌ

مِنْ هُنَا مَشَى مِنْ هُنَاكَ

- تَعَبَ النَّهَارَ غَيْرَ تَعَبِ بُكْرَةٍ.. الْوَقْتُ مَشَى دَائِمًا مَعَكَ

- تَحْتَكُ فِيهِ نَاسٌ عَاوِزَةُ الْأَمَلِ.. مَشَى عَاوِزَهُ؟ سَيِّهُولِهِمْ

(و)

- وَسَّعَ الْجَبْهَةَ لَوْ أَنْتَ كَثِيرٌ.. وَضَيَّقَهَا لَوْ أَنْتَ أَقْلٌ

- وَلَعَّ شَمَارِيخَ وَسَطَكَو أَوَّلَ مَا تَلَقَى الرَّتْمَ قَلَّ

- وَقَعَ لُمُضُ كُلِّ الْعَوَامِدِ اللَّيْلِ كَاشِفَةً نَاحِيَتِكَ

- وَدِّيَ الْإِعَاشَةَ^(١) قَبْلَ مَا تَدُوقُ لُقْمَتَكَ

- وَجَّبَ مَعَ السُّكَّانِ وَأَهْلِ الْمُنْطَقَةِ.. حَتَّى لَوْ فَاهِمِينَ

غَلَطَ.. فِيهِ نَاسٌ كَثِيرٌ مِتْلَخِبَةٌ.. إِكْسَبُ عِدَدٌ... وَإِكْسَبُ

غَطَا

- وَزَّعَ عَيُونَكَ فَوْقَ وَتَحْتَ.. وَخَافَ مِنَ اللَّيْلِ يَصُورَكَ

- وَطَيَّ وَعَيْنَكَ بِأَصَّةٍ فَوْقَ عِ الطُّوبِ وَإِلَّا يَعْوَرُكَ

- وَقَفَّ إِذَا سَحَبُوكَ عَلَى شَارِعِ طَوِيلِ

- وَفَرَّ بِدِيلِ

- وَافَقَ عَلَى الْهُدْنَةِ إِذَا سَحَبُوا الْكَلَابَ.. لَوْ سَابُوا خَلِيكَ

أَنْتَا آخِرُ حُدِّ سَابِ

- وَاحِدٌ يَفْرِقُ فِ الْعِدَدِ جَدًّا

- وَعِشَانُ كَدَهُ... أَوَّلَ مَا تَلَقَى إِنْ الصَّفُوفِ نَاقِصَاكَ

- وَسَّعَ مَكَانَكَ.. لِلِّي جَايِ وَرَاكَ

(١) الإِعَاشَةُ: مَا يَصِلُ لِلْمَعْتَقِلِينَ وَضَحَايَا الْكُورَاثِ مِنْ مَسَاعِدَاتِ.



إني رأيت اليوم.. الصورة من بَدَّة
وقلت الحسين لِسَّه.. هيمون كمان مدَّة
إني رأيت اليوم.. فيما يرى النَّائر
إن الحسين مَلوم.. فوق جثته عسائر
بيد غدغوه بالشُّوم.. كلُّ أمّا يجي يقوم
وإن البشر واقفة.. تبكي بدال ما تحوش
وإن العلم مصفاة.. م السونكي والخرطوش
وإن الطريق مفروش.. بالدم للأخر
إني رأيت اليوم.. الدمع الآيش
وإن الحسين إحنا..
مهما اتقتل.. حايش

www.bqfp.com.qa

978-99921-95-84-0



90100



9 789992 195840



دار بلومزبري - مؤسسة قطر للنشر
BLOOMSBURY
QATAR FOUNDATION
PUBLISHING



مؤسسة قطر
Qatar Foundation

تصميم الغلاف: كريم آدم